



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 025303 17 Iž**  
**Sarajevo, 23.05.2017. godine**

**IZVORNIK !**

Sud Bosne i Hercegovine u Sarajevu, u apelacionom vijeću sastavljenom od sudija Zvezdane Antonović kao predsjednika vijeća, Mirsade Džindo i dr. Branko Morait, kao članova vijeća, odlučujući o žalbi Slavka Maleševića, iz 78420 Srbac, Ul. Prvomajska broj 2, izjavljenoj protiv rješenja Centralne izborne komisije Bosne i Hercegovine, broj: 06-1-07-1-74/16 od 04.05.2017. godine, radi davanja saglasnosti na Odluku o imenovanju člana Općinske izborne Komisije Srbac, u nejavnoj sjednici održanoj dana 23.05.2017. godine, donio je

**R J E Š E N J E**

**Žalba se odbija.**

**O b r a z l o ž e n j e**

Rješenjem Centralne izborne komisije Bosne i Hercegovine, broj i datum navedeni u uvodu, nije data saglasnost na Odluku Skupštine Opštine Srbac broj 01-022.45/17 od 29.03.2017. godine u dijelu kojim je za člana Općinske izborne komisije Srbac imenovan Slavko Malešević.

Žalitelj je blagovremeno uložio žalbu na navedeno rješenje zbog netačno utvrđenog činjeničnog stanja i pogrešne primjene materijalnog prava. Ističe da je kao načelnik odjeljenja za opštu upravu u trajanju od 8 godina, po važećim izbornim Zakonima učestvovao u organizaciji i provođenju izbora u mjesnim zajednicama u opštini Srbac te lokalnim i opštim izborima u opštini Srbac, da je obavljao poslove posmatrača po odluci Centralne izborne komisije BiH i Opštinske komisije opštine Srbac, kao i da je učestvovao na seminarima obuke posmatrača na biračkim mjestima, obuke biračkih obuka i seminarima upoznavanjima sa aktivnostima provođenja izbora u skladu sa izbornim zakonom BiH, o čemu nema ni riječi u pobijanom rješenju.

U odgovoru na žalbu Centralna izborna komisija Bosne i Hercegovine (CIK BiH) je predložila da se žalba odbije kao neosnovana.

Žalba nije osnovana.

Rješenjem Centralne izborne komisije broj: 06-1-07-1-74/16 od 04.05.2017. godine, nije data saglasnost na odluku Skupštine opštine Srbac broj 01-022.45/17 od 29.03.2017. godine, kojom je za člana Općinske izborne komisije Srbac imenovan Slavko Malešević. Osporeno rješenje je doneseno nakon pravilnog i tačno utvrđenog činjeničnog stanja i pravilne primjene materijalnog prava.

Pravilno je od strane CIK BiH utvrđeno da Skupština opštine Srbac nije ispoštovala odredbe člana 2.2 stav (2) Izbornog zakona BiH i člana 2. stav (1) tačka c. i stav (2) Uputstva o utvrđivanju kvalifikacija, broja i imenovanju članova izvorne komisije osnovne izvorne jedinice u BiH (Službeni glasnik BiH br. 6/16 i 13/6) kada je donijela rješenje o imenovanju Malešević Slavka na dužnost člana opštinske izborne komisije Srbac.

Naime članom 2. stav (1) Uputstva o utvrđivanju kvalifikacija broja i imenovanju članova izborne komisije osnovne izborne jedinice u BiH (u daljem tekstu Uputstvo) je propisano da pored opštih uvjeta propisanim članom 2.2 izvornog zakona BiH, član izborne komisije MORA ispunjavati i posebne uvjete: c )da posjeduje iskustvo u provođenju izbora). Članom 2 stav (2) naprijed navedenog Uputstva je propisano da se pod iskustvom u provođenju izbora podrazumijeva

- a) članstvo u izbornoj komisiji,
- b) članstvo u biračkom odboru,
- c) rad u stručnim organima koji su pružali pomoć u prožanju izbora i
- d) objava stručnih i naučnih radova iz oblasti izbora.

Žalitelji pogrešno tumači gore navedenu odredbu Uputstva kada navodi da je dokaz o izbornom iskustvu to što je bio načelnik odjeljenja za opštu upravu u trajanju od 8 godina te što je učestvovao u organizaciji i provođenju izbora u mjesnim zajednicama u opštini Srbac, s obzirom da se izbori u mjesnim zajednicama ne provode po odredbama Izbornog zakona BiH, što znači i da isti ne predstavljaju izbornu iskustvo u smislu odredbi izbornog zakona BiH i navedenog Uputstva. Nadalje, tvrdnja da je u navedenom svojstvu učestvovao u provođenju lokalnih i opštih izbora u opštini Srbac je paušalna i proizvoljna, a podnosilac žalbe ni na kakav način ne ukazuje o kakvoj se vrsti izbornog iskustva radi, u smislu odredbe člana 2. stav (2 ) Uputstva. Dokazi o navodnom izbornom iskustvu koji je podnosilac žalbe priložio uz prijavu (svojeručno potpisana izjava, Rješenje o imenovanju na dužnost načelnika Odjeljenja za opštu upravu u Opštini Srbac(broj: 01/1-111-155 od 13.06.2005. godine, Odluka o izboru i imenovanju na dužnost načelnika Odjeljenja za opštu upravu od 12.02.2019.godine) su irelevantni, jer se istima ne dokazuje iskustvo u provođenju izbora u smislu člana 2. stav (2) Uputstva. Isto tako, irelevantni su navodi podnosioca žalbe kojima ističe da je učestvovao na seminarima obuke posmatrača na biračkim mjesima, obuke biračkih odbora i seminarima upoznavanja sa aktivnostima provođenja izbora, jer isti ne predstavljaju iskustvo provođenja izbora u naprijed navedenom smislu niti to iskustvo može predstavljati obavljanje poslova posmatrača po odluci CIK BiH i Opštinske izborne komisije Opštine Srbac.

Iz navedenih razloga Apelaciono vijeće nalazi da je pobijano rješenje Centralne izborne komisije Bosne i Hercegovine pravilno i zakonito, a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, br. 19/02, 88/07, 83/08 i 74/10) valjalo odbiti.

**PREDSJEDNIK VIJEĆA  
S U D I J A  
Zvezdana Antonović**